



KRISTIAN THALAI

April
2014



Kristian Thalal Pawl Chanchinbu thla tin chhuak


Vol V No. 2

GENERAL CONFERENCE

27th Feb. - 2nd Mar., 2014
chhungin

**Khawzawlah
neih a ni**

*Palai - 24146
Langa kal - 1000*



MIZORAM PRESBYTERIAN KOHHRAN : KRISTIAN THALAI PAWL
55th GENERAL CONFERENCE
DIAMOND JUBILEE

Thupui : 'Tho la, eng rawh' Isala 60 : 1
Speakers : Rev. H. Lalrinmawia, Rev. Lalzuthanga, & Upa C. Ngürthantluanga
27th Feb. - 2nd March, 2014



Central K.T.P. hruaitu 2012 - 2014

Kristian Țhalai Pawl chanchinbu thla tin chhuak

1970-a chhuah Țan ■ Kum 44-naa wawi 4-na ■ Chhuah tawh zat : 427

Editor :

R. Lalhmingthanga

Joint Editors :

Upa Lalhruaizela
Pu Lalmuanpuia Hrahsel
T. Upa Lalremsiama
T. Upa Dr.H.Lalthanzara

Manager :

Lalmuanpuia

A lak man :

Kum khatah - Rs. 60.00
Copy khat - Rs. 5.00

Thu chhuah tūr nei chuan Editor, Kristian Țhalai, Synod Office-ah thawon tūr a ni a; a la duh chuan KȚP Office-ah a man pēk lāwk a ngai.

Office Phone : 2326372/2335821

**E-mail : kristianthalai@yahoo.com
centralktp@gmail.com**

**Visit us :
cktp.blogspot.com
www.facebook.com/centralktp**

KRISTIAN ȚHALAI PAWL

Thupui

Rawngbawl tūra chhandam

Thupui inngahna

Ephesi 2:10 Thil Ța ti atán Krista Isuaah chuan siama awmin, ama kutchhuak kan ni si a, chu thil Ța tih chu kan awmna tūr in Pathianin a buatsaih lāwk a ni.

Thil tumte

1. Isua Krista rinna leh amah anna kawnga Țhalaita hruai.
2. Kohhran kut ke ni tura Țhalaita buatsaih.
3. Kohhran hnathawh tihpuitlin.
4. Krista Chanchin Țha puan darh.

A CHHUNGA THU AWM

1. Isua phumtu – mi huaisen pahnih	2
2. I hlutna kha tu kutah nge i dah?	7
3. KȚP General Conference wawi 55-na a Țiak ta	10
4. Hun ropui KȚP Diamond Jubilee & Gen. Conf. 2014	13
5. Lal Isuan kan hrehawm a hria	17
6. Zu leh Wine	20
7. Englai pawha engkim mamawh chu Lal Isua chauh	22
8. Sulhnu	25
Editorial	1
Kantu	29
Hringlang tlāng	28
Keimahni	31-32



THIL ṬHA TIH ZEL

Hun leh kum an ral a, rei lo te kan tih chhungin Kristian Ṭhalai Editorial Board-te pawh chanchinbu enkawl hna tling lo taka kan enkawl ve theih hun chhung a zo ta reng mai. Kum 2012-2014 chhunga Kristian Ṭhalai chanchinbu hmasawn theihna tura in mi duhsakna, fuihna zawng zawngah thinlung takin lawm thu kan sawi e. Chanchinbu atana tha leh zung sengtu zawng zawngte Pathian ram rawngbawol hna in thawh zawng zawngte a hlu kan ti a; tin, chanchinbu latute leh chhiartute zawng zawng chungah Editorial Board-te kan lawm em em a ni.

He chanchinbuin hma a sawn zel theihna atan in thu leh hla kha a pawimawh reng a, ṭhahnemngai taka theihtawp chhuah zel turin kan ngen a che u. Chanchinbuia târ lan thil hrang hrangah famkim lohna a lang leh ṭhin, târ lan hmaih, chhut sual, chanchinbu hmuh loh palhte pawh awm thei, khang kan tihsual kan hriat leh hriat lohte thlengin in mi hriat thiamna leh ngaihdamna kan dil e.

KṬP member kan nih lai hi thil ṭha ti zel tura kan chak ber hun lai a ni a, kan hmazawna tih tur leh mawhphurhna awm apiangte hlen turin ke i pen zel ang u. Thil ṭha ti atana siam kan nih vang hian kan chhungkuaah, kan kohhranah, khawotlangah, ram pumah kan thil ṭha tihin nghawng ṭha zawk leh dik zawk a neih zel theih nan fimkhur takin ke i pen zel ang u. Kan inkhawm, fellowship, inkhawmpui leh thil dang reng reng Pathian hminga kan chhuahnaa telve, awm ve satliah ringawt nia kan inhriat lai hian kan tel ve avang te, tih tak zeta Pathian kan fak ṭhin avangte khan ring lo mi leh ringtu kan unauten nangmah kaltlang khan Pathian an hmu ṭhin a ni tih hre rengin, hun harsa leh hrehawm paltlang mek pawh ni la; tin, i hlim leh lawm ber hun lai leh i nunah eng mah thil thar leh lawmna tur pawh awm chuang lo nia i hriat lai pawh khan, Pathian be tura i rawn pen chhuaha, a rawngbawol tura i inpekna khan nangmah leh i kianga mite hnenah Chanchin Ṭha puan darhin a awm zel ṭhin a ni. Thil ṭha ti zel turin Pathian ropui nan i vanglai hun hmang zel ang che.

Kristian Ṭhalai chanchinbu chhiartute zawng zawng Thil ṭha ti zel turin duhsakna kan hlan a che u ♦

April Issue Kristian Ṭhalai hi Editorial Board ṭanglaiten an la enkawl a, May Issue aṭangin Editorial Board tharten an enkawl tawh dawn a ni.

ISUA PHUMTU – MI HUAISEN PAHNIH

(Marka 15:42-47; Johana 19:38-42)

— Upa D.P. Biakkhuma, Synod Office

1. **Thuhmahruai:** Kan thupui hi “Isua phûmtu - mi huaisen pahnih” tih a ni a. Thupui then pathum a awm a, han ngaihtuah thuak chuan sawi tûr a tam duh lo hmêl khawp mai. Thupui thente sawi hma hian mi huaisente pahnih chu tute nge tih leh an chanchin tângpui hi sawi hmasak loh theih loh a ni âwm e. Mi huaisen pahnihte chu Joseph-a, Arimathai khuua mi leh Nikodema, zâna Lal Isua rawn pantute kha an ni. An chanchin chu hetiang hian sawi zui ila –

1:1 Joseph-a: Mi huaisen pakhat zâwk chu Joseph-a a ni a. Bible-ah hian a chanchin hriat tûr a tam lo hle mai a, a chanchin an sawia amah tichiang (identify)-tu tak chu, “Joseph-a, Arimathai khuua mi” tih chu a ni. A chanchin an sawi dân chuan he Joseph-a hi Isua Mari nuṭapa, Isua pâ a ni a. Isua nû Mari nuṭapa a lo ni kher kher hi a vânei hle a ni. Chu chuan Isua pu Ropuia a nihîr a ni an ti nghê nghê. Arimathai khuua a

chên hma hian Egypt (Aigupta) rama Marmorica-ah a chên thîn avângin Joseph de Marmaore tiin an ko thîn a ni âwm e.

An sawi dân chuan Joseph-a hi thîr lama sumdâwng thîn a ni a, a hna avâng hian England, India leh South America thlengin Isua hruaiin a kal a ni an ti. Amah hi mi hausa, mi challang tak a ni a, Rome sawrkârah pawh rorêltu zahawm (High counsellor) a ni a, Nobilis Decurio (Minister of Mines) pawh ni hiala sawi a ni.

Sakhaw lamah pawh Joseph-a hian a tawng sâng hle mai. Juda sakhuaa rorêlna sâng ber Sanhedrin member ni pha ngat a ni. An sawi dânah chuan Isua a ṭan avâng leh a thih hnu a Pilata hnênah Isua ruang dîla, a sawngbâwl zui dân avâng tein tân inah khung a ni hiala a sawi a ni.

1:2 Nikodem-a: Pathian Lehkhabu Thianghlim (Bible)-a kan hmuh dân chuan Pharisai hausa a ni a, Sanhedrin member niin, Judate hotu a ni. a hming

awmzia hi 'pawi sawi lo thisen' tihna a ni âwm e. Johana 3:1-13 kan chhiar chuan zânah a rûk têa Lal Isua hnêna lo kala, Lal Isuan, "Tih tak meuhvin, tih tak meuhvin ka hrilh a che, mi tu pawh an pianthar loh chuan Pathian ram an hmu thei lo vang" tih te, "Tih tak meuhvin, tih tak meuhvin ka hrilh a che, mi tupawh tuiah leh thlarauva an pian loh chuan Pathian ramah an lût thei lo vang" tih leh "Israel-te zirtirtu i ni si a, chûng chu i hre lo maw?" tia a chillh neka kha a ni.

Zâna a rûk tea Isua hnêna a kal hi a chipui Juda-te a hlauh vâng nia rin leh sawi a ni thîn a. Amaherawhchu, chu lam ngawr ngawr chu niin a rinawm hran lo. A chhan chu Nikodema kha sakhaw lam zirtirtu, nilenga mi dangte zirtîr thîntu a ni a, a hun thâwl leh remchâng neih chu zân hun a ni. Chutih rual chuan Lal Isua pawh khân chhûnah rawng a bâwl thîn a. Nilêng lêngin hun âwl leh fianrialna hun takngial pawh nei hlei thei lovin mipuiin an bâwr luai luai a ni a, chaw eina hun takngial pawh nei thei lo a nih avângin a hun âwl neih theih chu zân lam baw a ni. Chu bâkah, sakhaw lam thu khûnkhan leh thlarau lam thurûk sawi tak tak tûr chuan mipui vantlângin an chîm buai loh hun, an hna lamin a delh rih loh hun leh Juda

sakhaw hotu leh Sanhedrin member dang ten an hmuh loh hun zân lam kha an hun thâ neih chhun chu a ni mai a. Chuvângin, Lal Isua leh Nikodema kha zânah an inhmua ta ni berin a rinawm a ni.

2. **Kraws-a Isua ruang chu zân riahtîr tûr a ni lo.** Joseph-a Arimathai khuaa mi leh Nikodema-ten Pilata an dîl a, an la thla a, an phûm. Juda sakhua leh hnam dânah mi sual krawsa khenbehte chu zân riahtir awih a nih loh avângin Chawlhni (Sabbath) lo thlen hma ngeiin kraws aţanga lâk thlâk ngei ngei tûr a ni. Chuvângin, Lal Isua ruang pawh hi lâk thlâk ngei a ngai a ni. Juda-ten Isua an khenbeh lai boruak hi a rit êm êm mai a. An Lalpa leh zirtirtu ber krawsa khêngbeta an tihhlum tâk siah chuan Amah zuitute pawh an râlḡi tak zet a. Isua ruang hlâwm tûra pên chhuah ngamna chi ziazâng a ni loh avângin Joseph-a, Arimathai khuaa mi leh Nikodema, zâna Isua hnêna lo kal, a hma lama an chanchin kan sawi tâkte khân Pilata hnênah Isua ruang lâk thlâk an dîl ta a. Isua nû leh pâ emaw, an chhûngkhat lainâte emaw, Amah zuitu zirtîrte tân Isua ruang hlâwma bawihsâwmtu nih chu thiltih ngam chi a ni lo. Isua ruang chu krawsah zân riahtîr a rem si loh

avângin Pilata pawh hian an Juda dân hre rengin a lo phalsak ve mai pawh a nih a rinawm. Tichuan, an la thla a, Joseph-a thlân thar, tu mah la zalh ngai lohnaah chuan an phûm ta a ni.

Isua ruang hlawma, kraws aţanga la thlaa, thlâna phûm chungchângah hian sawi tûr tam tak a awm thei ang. Hetiang hian lo sawi zui ila –

2.1 Isua ruang hlâwm tûra lo pên chhuah hi martar nun a ni.

Kan sawi tâk ang khân Rome sawrkâr leh Juda sakhaw hotuten Lal Isua chu mana krawsah khêngbetin an tihlum zo chauh a ni a. Lal Isua chauh ni lovin Amah zuitute leh a zirtûrte zawng zawng pawh tihchimih vek an duh lai a ni a. Hetiang hun râltit lai taka Isua ruang hlâwmtu nih chu thih huama pên chhuah ngaihna chi a ni a, khawvêl nun vui liam tûra inbuatsaih ngaihna chi a ni. Chumi awmzia chu Lal Isua ruang hlâwm hi Martar nun a ni ringawt mai. Chutiang huam chuan Joseph-a leh Nikodema hi an lo pên chhuak a ni.

2.2 Isua ruang hlâwma phûm tûr chuan insênso a ngai. Lal Isua ruang hlâwma thlâna phûm tûr hian keinin chhûngkhat laina ruang kan hlâwma, thlâna kan phûm ang ngawt hi a ni lo tih kan hriat a ngai a ni. Hetiang hian tawi tein han sawi zui ila:

2:2.1 Thlân thar, tu mah la zalh ngai lohnaa Isua phûm tûr hian sum tam tak sên a ngai a ni.

Bible-a kan hmuh ang leh kan hriat theuh angin Lal Isua ruang hi thlân thar tu mah la zalh ngai lohna hmunah zalh (phûm) a ni a. Isua an phûmna thlan hi rorêltu zahawm, mi hausain mahni chhûngkaw thlân atâna uluk taka a buatsaih a nih avângin thlân narân a ni lo ang tih chu thil chiang saah dah ila. Lung hmuna ban khur laih har dân ngaihtuahin thlân lung kerkuak, lung bang sak tak mai, mihring ruang dahna tûr khawp chu sawi loh, luh theihna khawp han ker chu a man a tlem thei lo hrim hrim a ni. Rorêltu zahawm, mi hausa ni bawk chuan amahin a lai dawn lo hrim hrim a, hlawhfa a chhawr ngei ang tih a rinawm a. A nih loh vèk pawhin thla bi hlawh neia a mi chhawrtin an lai ngei ang. Eng pawh ni se, he thlân buatsaihna hi mi hausa leh mi lianten an neih leh an tih theih chauh a ni. Lal Isua thlâna phûm thua hian Joseph-a hi a insêngso nasa hle a ni tih thil chiang sa a ni a. Chuvângin Lal Isua zui a, a ruang tuam hlâwm tûr chuan insênso a ngai. Insêngso lovin Lal Isua a zui tak tak theih loh tih kan hriat a tûl.

2:2.2 Lal Isua ruang phûm tûra buatsaihnaah hian rimtui man tam tak sên a ni. Bible kan

chhiarah khân Lal Isua ruang phûm tûra buatsaihnaah Nikodema chuan mura leh aloe inpawlh sa bûk sawmnga a rawn keng a. Chu chuan Lal Isua ruang chu an chulh/hnawih a, a phûm ta a ni. Mura leh aloe inpawlh bûk sawmnga hi tûn ang hunah chuan British-ho pound zâ (45.35 kg) vêl a ni a, India tangka chuan Rs. 60,000/70,000 hu vêl a ni thei ang. A pawimawh lai tak erawh chu, Lal Isua ruang rintui hnawih atân hian Nikodema hi a insêngso nasa hle a ni.

3. Joseph-a chu rorêltu zahawm tak, a rûka Isua zirtîr a ni a. Nikodema pawh zâna Isua hnêna kal kha a ni a. An chipuiten Isua an khêngbet; mahse, hlau lovin a hun takah an lo lang a, Isua ruang an phum. Bible-a kan hmuh dân leh a hma lama kan sawi tawh ang khân Joseph-a chu rorêltu zahawm tak, Sanhedrin member a ni a. Rorêltute zîngah tel mah se a rûk têa Isua zirtîr (a rûka Kristian) a ni. Nikodema pawh hi a hma lama kan sawi tawh ang khân Pharisaï hausa, Sanhedrin member leh Juda-te hotu a ni. Nikodema hian a hma lamah pawh Lal Isua chungchânga an inhniahnaah Lal Isua ñanin, “Amâ kê ngeia a thu hriat leh a thiltih hriat hmâin kan Dânin mi thiam loh

a chantîr ngai em ni?” (Jn 7:51) tiin a langin a lo ñan tawh nghê nghê a ni. Sanhedrin member-te duh dânin Pilata’n khenbeh thu a pê a, an chipuiten Isua chu an khêngbet ta a nih kha.

Kan sawi tâk ang khân Juda-ten an Lal Messia haia krawsa khêngbeta an tihhlum lai khân a boruak a lum êm êm mai a. Juda-te chuan Lal Isua chauh ni lovin Amah zuitu (Kristian)-te zawng zawng pawh tihchimih vek an duh a ni a. Hetih lai tak hi chuan Lal Isua nu leh pa nih te, a laina nih te, a zuitu nihte chu a tiha tih ngam chi a ni lo. Amaherawhchu, hêng mi huaisen pahnihte erawh hi chu hlau lovin a hun takah an lo lang a, huaisen takin Pilata hnênah Isua ruang lâk thlâk an dîl a, Joseph-a thlân thar tu mah la zalh ngai lohnaah chuan an zalh ta a ni. Thlân chungchâng chu a hma lamah kan sawi tawh kha duh tâwk mai ila.

4. Huaisen taka amah zuia ñan ngam tûrin Isuan min duh: Tûnah chuan kan thupui ñhen hnuhnung ber leh thupuiin min luhpui a tumna ber leh min kawh hmuh a tum ber kan lo sawi tawh mai ang a, chu chu huaisen taka amah zuia ñan ngam tûrin Isuan min duh tih hi a ni ang a. Kan thupuiin min duhsak êm êm chu Joseph-a leh

Nikodema-te anga huaisen taka Lal Isua zuia ñan ngamtu kan nih hi a ni ber mai.

He thupui ñhen kan sawi lai hian rilruah zawhna lo piang chhuak mai thei awm chu 'huaisen taka Lal Isua zuia ñan ngam chu eng nge a ñatna leh a hlâwkna?" tih hi a ni a. A chhâna pawh heti hian a sawi nghâl mai theih âwm e. Rom 10:9-10 kan chhiar chuan, "I kain Isua chu Lalpa a ni tih i ñana, mitthi zîng atâ Pathianin a kaitho tih i thinlunga i rin chuan chhandamin i awm ang," tih leh "Miten thinlungin an ring a, felna an hmu ñhin a; kâin an ñan a, chhandamna an hmu bawkw ñhin a ni," tih thu hi kan hmu a. Pathian thu kan târ lan tâk añang hian hêngte hi chiang takin kan sawi nghâl thei a ni.

4.1 Kâa Lal Isua ñana, thinlunga rin chu chhandamna a ni: Kâa amah ñana, thinlunga amah ringtu chu Lal Isuan a ngaihtah mai mai ngai lo va, chhandamna lukhum a khumfir a, chhandamna bangin a hung flat ñhin a ni.

4.2 Thinlunga Lal Isua rin chu felna a ni: Mi sual leh mi fel lo ber pawhin thinglunga Lal Isua a rin flat chuan rei rial lovin an nun a lo thlâk danglamsak a, mi felah a lo siam thuai ñhin a ni.

Unaute u, Isua phûmtu – mi huaisen pahnihte chanchin añangin thil chi hrang hrang kan sawi ta a.

Kan thupuiin min beisei ang leh min hruai a tum ang hian Joseph-a leh Nikodema te anga a hun taka Lal Isua zuitu leh ñan ngamtu Kristian kan nih theih nân Lalpan a thu mal min sâwmsak ñheuh rawh se. AMEN♦



Central KÏP hruaitu chhuak tate kamchhuak....

Ka kawm phak loh tur ñhian ñha min pe a, ka ei phak loh ei tur tuihnai min hlui a, ka thlen phak loh leh hmuh phak loh tur tur min hruai thlengt, mi pangngai min siama, mual êng min hmuhtirtu KÏP hi ka tan chuan hei lo liama PHEICHHAM. Ka pheichham man hi rawn man ve la, i inchhir ngai lo vang. – Upa Zothangzuala Chhange



Khawvela pawl ñha ber, he khawvel mai ni lo, vanram min thlen thei pawla ka tel thei hi ka lawm a, member theihtawp chhuaha tel turin ka chah a ni. – T. Upa Zohmangaiha



*1. Chhim leh hmar, chhak leh thlanga KÏP memberte inpekna leh tih tak takna hmel ka hmuh hian hma lam pan turin min nawr ñhin.
2. Thil dang zawng zawng aiin KÏP kan thlang ta rau rau bawkw a, nek puar pawp mai ang aw. – Pu Lalhnghinglova Hauzel*

Ṭhalaite pualin aw...
**I H LUTNA KHA TU
 KUTAH NGE I DAH?**

— VLC Vanlahriatrenga,
 Kumtluang Rûn

Zleirāwl pakhatin, “Ka hmêl hi a chhia ka ti lutuk; zai chhiat belhchhah a nia ka duh; ka inhaw hluah hluah,” tiin mittui tla kiang kiang chungin min hrilh a. Eng nge a chhan ka zawh chuan, “Tu mahin min ngaihlu lovin ka hria; ka chhûngte pawhin min fak ngai lo; ka thawmhaw pawh ka inhmehtu an sawi ve ngai lo,” a ti a, lainatawm ka ti ngei mai. Ṭhalaite zîngah, puitling pangngaia piang tawh phawt chuan ngaihzwâwng neih duhna hi an pianpui theuh a. Ngaihzwâwng neiten an hmachhawn fo chu inṭhenna hi a ni ve bawk a. Hetianga kawppui nena inṭhen, rilru hahte ṭawngkam ka hriat fo chu, ‘Damin awmzia a nei lo, inchei pawh ka peih tawh lo, nun uluk pawh awmzia a awm lo, hlutna ka nei tawh lo,’ tih leh ruihhlo lama tlân zuite hi a ni fo. Hemi chungchangah hi chuan Katty Perry

thukhawchang hi zir tham a ni. A bialpa Russell Brand nena an inṭhen chungchanga a thusawi a ni a; amah anga nun hmang mekte tân a ṭangkai tâkin sawi chhâwng ang aw.

“Kan inṭhen kha a na lutuk a, hmaia hnek chawrh chawrha, kailawna tlawh thlak nawk nawk anga nâ a ni,” tiin. A thusawi dang, rilru khawih deuh chu: “Ka hlutna kha mi dang kutah ka lo dah a ni. Miin min ngaih dan aṭang ringawtin hluin ka lo inhria a; mahse, keima theihna leh keimah zâwk hi inhlut tur ka ni tih ka inhre ta a ni. Miin min duh loh vânga hlu lo leh ṭangkaina nei lo anga inngaih kha mahni inrin tâwk lohna lian tak vang a ni tih ka hria a, tûnah chuan nun thar ka nei ta,” tiin (Vanglaini Oct. 22, 2013). Kan ngaihzwâwngte avâng mai hian hluin kan inhria em? Kan hlutna hi mi dang kutah kan lo dah reng lo maw? Mahni inngaihhlut thiam hi nun hlimna pakhat a lo ni reng nia. I hlutna chu nangma kutah a awm a. I hlutna kha i tipung zêl dâwn nge i tikiam zêl zâwk dâwn tih chu nangma thu a ni e.

Ngaihsanawm Taylor Swift:

Mi tam tak ngaihzwâwngte leh kawppuite ṭhen avânga nun beidawng, hlutna kiam ta duaia

inhria an awm châwk; thil ni thei a nihna lai pawh a awm. Mahni hmakhua ngaihtuah lèk lova nawmchenna tura ngaihzâwng nei, invawng thianghlim lo tân chuan kawppuite ùthen chu na âwm rêng pawh a ni. Hmuhsit zui theiha awmte tân chuan mahni hlutna kiam taa kan inhria a nih pawhin kan cho chhuah a nihna chen a awm ang. A chhan chu mahni nun thununa, thil ùtha lo rawn hring leh thei lakah chuan invawn nachâng hriat hi mihring puitling, rilru fîm hmang rualte chuan kan mawhphurhna a ni tlat. Khawvela milârte hian sex hi an inkuhva ùtheh mai mai vek emaw kan tih laiin a hmêlùthat avânga tûnlai ùthalaite ngaihzâwn rawn Taylor Swift hian ngaihzâwng nei ve ùthin mah se, a nulat thianghlimna a la vawng him a, pasal a neih hma chuan sex hman a tum lo nia! (The revival evangelical weekly, vol. xvi. issue no. 22) Ani hi chu khawvel mit fukna a nia. A sam tan lai mai mai pawh tleirawlte ngaihsan dang Harry Styles, Ellie Goulding leh Cara Delvingne te pawhin backstage aùtangin an en ùthap peih a nia. Chuti chung chuan tun thlengin a thianghlimna a vawng him thei asin (The Aizawl Post, Feb.13, 2014). Entawn tlak a ni

mang e. Kan zuan hmain kan tlâkna tur hmun kan en lâwk thiam hi a pawimawh ngei mai.

I kawppui siam ùthatu i ni thei:

Khawvelin a chezia hmuhnawm a tih êm êm Shakira hian a kawppui, Pique-a chu Pathian lamah pawh a rinna tinghettu a nihzia a sawi (The revival evangelical weekly, vol. xvi. issue no. 25). Mahni kawppuite, ngaihzâwngte, Pathian rinna leh nun kawng ùtha lama hruaitu, mite nuna danglamna thlentunih theih hi a va'n ùtha êm! Mahni ngaihzâwngte dinhmun hlauhawma dintirtu nge kan nih an nuna hriat reng tur thil ùtha leh duhawm thlentun le?

Tlûk luhna dik aw:

Eng emaw avanga harsatna tawkin i beidawng hle a ni thei e. Beidawn lai chuan rilru fim put a har a, thutlukna siam thiam a har ùthin. ùThalai, tleirawl tam takin mahni ùthiante hnen aùtangin thurawn (advice) him lo tak kan dawng a, ruihhlo lamah te kan tlan a, kan tuar leh nge nge ùthin. I rilru a mangan a, i beidawn chuan nangmah ùtanpui turin Synod-in Family Guidance & Counselling Centre a buatsaih a; eng kohhran mi pawh, ùtanpui

mamawh apiangte pan theih turin Thawhṭan aṭanga Zirtawp thleng Sikulpuikawn, Vaivakawn leh Chanmari-ah an inhawng reng a, Counsellor rin tlâk tak tak, Pathian nena nangma nun i din thar leh theihna tura ṭanpui tur chein an inhawng reng a. I pan remchang

thei lo a nih pawhin, ruihhlo leh thil ṭha lo lama tlân lovin, Pathian hnenah tlu lut thuai la, i nun din thar thuai ang che aw. “Anin a ngaihsak ṭhin che u avangin in manganna zawng zawng ama chungah nghat vek rawh u,” (1 Petera 5:7)♦



Synod Bookroom lehkhabu thar ṭhenkhatte

1. **Beramno Chawimawina:** Mizote hla ṭha leh nung tak tak 123 zet min phuahsaka, hrehawm tam tak bakah mualphona hial hla avanga tawktu Lalliansawma chanchin leh a hlate lo pian dan chu ngaihnawm takin R. Lalrawna chuan a rawn tichhuak ta. A man Rs. 150
2. **Pathian thu puan chhuah thiltihtheihna:** He lehkhabu ziaktu Derek Prince hi mi thiam, lehkhabu pawh 50 aia tam ziaka Pathian thu Sermon Audio 500 leh Video pawh 160 aia tam siam tawh a ni a. A lehkhabute hi ṭawng hrang hrang lehlin a niin “I lei khan tihdam a mamawh lo maw?” tih Mizotaṭwanga kan neih pawh kha ama ziah hi a ni nghe nghe. Chutiang mi kutchhuak chu Lalthanpuiin min lehinsak leh ta. A man Rs. 50
3. **A kin ta:** Bible-a thumal, Mizo ṭawng ni lem lo, Mizo ṭawng anga kan hman tak te leh Bible-a thumal lar zualte chu Ng. Kapliana chuan mi tin hriat thiam turin min hrilhfihsak a. Hmang ṭangkai thiamtu tan thlarau lam chaw leh sermon puitu ṭha tak a ni thei. A ziaktu hian he lehkhabu a ṭanga hlawkna awm apiang chu misionary chawm nan leh kohhran ṭhanlenna atan hman a tum nghe nghe a ni. A man Rs. 100
4. **Khawvel mi ropuite:** Khawvel mi ropuite phenah hian eng nge awm? Mihring heti zat kan awm lai hian engati nge mi ropui chungchuang hi an awm theih bik? Kan neih loh eng nge an neiha, kan tih loh eng nge an tih bik? Heng chhanna hi i hriat duh chuan khawvel mi ropui 25-te chanchin ngaihnawm leh bengvarthlak, Malsawmdawngliana buatsaih hi lo ṭhutchilh ve teh le. A man Rs. 150
5. **Khawvel mi tumruh hmingthangte Vol. 2:** He lehkhabu Zomawia Kiangte buatsaihah hian khawvel mihring piang tawh zinga mi tumruh bik pariatte, an chanchina zir tur awm, ngaihnawm piaha a chhiartute thinlunga tumruhna thar siamsak theite târ lan a ni a. A ziaktu hian 2011 March thla khan Vol. 1 a lo tichhuak tawh nghe nghe. Rs. 80 man a ni e.
6. **I tan ka ti:** Ṭhalaithe hian thupui dangdai, article sei lutuk lo leh hlimawm lam hi kan lawm ṭlangpui. Chutiang tak lehkhabu chu C. Lalrochharan a rawn peih fel ta. “Ka kekawrte” “Nang awm lo la chuan”, Kan kuaah Krismas” leh “Aizawlah in kan luah e” tihte hi a heading a ṭang pawhin chhiar a chakawm. A man Rs. 150

KṬP GENERAL CONFERENCE VAWI 55-NA A ṬIAK TA

Mizorama Ṭhalai Inkhawmpui lian ber Kristian Ṭhalai Pawl General Conference wawi 55-na leh Diamond Jubilee lawmna, Khawzawla nghah, February 27 aṭanga ṭan chu March 2, 2014 (Pathianni) zan khan a ṭiak ta. A thlengtu lam chhinchhiah danin palai riak lut zat 24146 an ni a, langa kal hi 1000 chuang an ni bawk. KṬP kum 60 tlin lawmna Diamond Jubilee a nih bawk avangin Central KṬP hruaitu hmasate pawh a bik taka sawn an ni a, hruaitu lo ni tawh (Speaker-te nen) 34 lain an telpui thei a ni. Thupui atan *“Thola, êng rawh”* (Isaia 60:1) hman a ni a, CKṬP hruaitu hlui vek Rev. H. Lalrinmawia, Rev. Lalzuithanga leh Upa C. Ngurthantluanga ten a sawi. Ramthar lam hawi programme ah Dr. Ramdinthara Sailo-in thuchah a sawi bawk. Multiplex programme hmun 4-ah neih a ni a, Biak In 3 leh YMA Hall 1 hman a ni a, heng hmun

4-ah hian a chhunga leng lo pawna thu ṭhahnem tak an awm ṭheuh a ni.

Rorel palai kal dan hetiang a ni:

1. CKṬP Committee - 21
 2. Bial aiawh palai - 179
 3. Branch aiawh palai - 748
 4. Synod Puipate - 2
 5. Central Kohhran Hmeichhe Committee aiawh - 2
 6. Minister/Pastor/Pro Pastor/Upate - 15
 7. Chhimitute - 36
- Lairam Isua Krista Baptist Kohhran (LIKBK) - 2*
Presbyterian Youth Fellowship (PYF) - 2
Kristian Khanglai Pawl (KKP) - 2
Chhimtu dang - 30
TOTAL – 1003

Thurel tlangpuite:

KUM 2018 K.Ṭ.P. GENERAL CONFERENCE THLENGTU RUAT/PUAN

A hmun : West Phaileng

A hun : March 1 – 4, 2018

THUREL

Kum 2014 chhungin ram pum huapin Thawhṭan zan inkhawm thawhlawm wawi khat Synod Hospital Charity Fund pualin lak khawm rawtna:

“Kum 2014 chhungin ram pum huapin Thawhṭan zan inkhawm thawhlawm wawi khat Synod Hospital Charity Fund pualin lak

khawm ni rawh se" tih rawtna Armed Veng Bial aṅanga lo lut chu a theh luttu Bial te sawifiahtir an ni a. Hei hi palaiten an sawi ho hnuah rawtna thu hi siamremin "*Kum 2014 chhungin KṚP inkhawm thawhlawm vawi khat Synod Hospital Charity Fund pualin lak khawm ni se*" tih a ni.

Human Trafficking chungchangah Central KṚP-in hma la tura rawtna:

"*Human Trafficking chungchangah Central KṚP-in hma la rawh se,*" tih rawtna I.T.I. Veng Bial aṅanga lo lut chu a theh luttu Bial te sawi fiahtir an nih hnuah agenda General 4-naa Venghnuai Bial aṅanga rawtna "*Mizo ṭhalai, hna leh zirna avanga Mizoram pawna chhuakte hna leh zirna him taw lo laka an fihlim theih nan leh harsatna nasa zawk an tawh loh nan he lama fimkhur a ṭulzia inzirtirna Central KṚP-in neiin hma la rawh se*" tih chu a theh luttu Bial te sawi fiahtir an nih hnuah heng rawtnate hi lak kawp a ni a. Human trafficking chungchangah leh Mizoram pawna Mizo ṭhalai hna leh zirna avanga chhuakte hna leh zirna him taw lo laka an him theih nan leh harsatna an tawh loh nan fimkhur a ṭulzia inzirtirna CKṚP *hmalaknain nei ni rawh se* tih a ni.

Youth Recreation Center (YRC) puala KṚP member tina ₹ 5 kan intuk ṭhin tihpun chungchang:

"*CKṚP-in Youth Recreation Centre (YRC) pual member 1 (pakhat) a ₹ 5 a khawm ṭhin hi tihpun ni rawh se*" tih thu Khatla Bial aṅanga lo lut leh Agenda 7-na "*YRC puala member tina ₹ 5 kan intuk ṭhin hi tihpun ni rawh se*" tih thu Dawrpui Bial aṅanga lo lut chu la kawpin YRC puala sum kan khawn hi *tihpun ni se* ṭha tiin budget sawi hunah hei hi rel zui a ni a, member tinte thawh tur ₹ 5 ni ṭhin chu ₹ 10-a tihpun a ni.

KṚP member ṭhalai zawkte hip khawm thei tur programme siam/buatsaih chungchang:

"*KṚP member ṭhalai zawkte hip khawm thei tur programme CKṚP-in ngaihtuah rawh se*" tih Central KṚP Committee aṅanga rawtna awm chu CKṚP aṅanga sawi fiah a nih hnuah hei hi tihlawhtling turin a ṭul angin *CKṚP-in hma rawn la se* tih a ni baw.

KUM PUAN CHUNGCHANG:

1. 2015–2016 hian Kumpulan *nei leh ni se* ṭha tih a ni a. Kumpulan thupui atana rawtna Bial 6 aṅangin a rawn lut a, hetiangin:
 - (1) Insumtheihna (Galatia 5:23)
– *Hmunṭha Bial*
 - (2) Krista tana danglam ngam
– *Dawrpui Bial*

- (3) Rawngbawltu nun
– *Chaltlang Bial*
- (4) Thinghlimna
– *Phuldungsei Bial*
- (5) Ṭhalaite leh Politics
– *Keiṭum Bial*
- 6) Rawngbawlina hlen (2
Timothea 4:5) – *Khawbung Bial*

Rawtna lo lut zingah Kum
2015–2016 atana KṬP Kumpulan
thupui atan “**Krista tana
danglam ngam**” tih thlan a ni a.
Bible chang inngahnaah **Rom
12:2** ni se tih a ni.

BUDGET (2014 -2015)

Budget ruahmanna
hetiangin pawm a ni:

1. **Bial budget: ₹ 3,10,300**
2. **Youth Recreation Centre:
₹ 1366700**

Total : Rs. 44,69,700

Kum 2014 -2016 CKṬP Hruaitu tur thlan tharte:

- (1) Dr. Julie Remsangpuii,
Zonuam Bial
- (2) Dr. Lalliansanga,
Durtlang Bial
- (3) Pu Samuel Laldingliana,
Electric Veng Bial
- (4) Upa K. Rorelkima,
Ramhlun North Bial
- (5) Pu R. Lalruatkima,
Dawrpui Bial
- (6) T. Upa Richard B. Lalhriatpuia,
Armed Veng Bial

- (7) Tv. R. Lalramnghaka,
Bawngkawon Bial
- (8) T. Upa T. Lalawmpuia,
Ramhlun Vengthar Bial
- (9) Pu Ngunrhmingliana,
Khatla Bial
- (10) Pu Vanlalpeka,
Chanmari Bial
- (11) Pu Zonunsanga Ralte,
Mission Veng Bial
- (12) Tv. Joseph Lalsangzuala,
Chaltlang Bial
- (13) Pu Lalthangvunga Sailo,
Republic Veng Bial
- (14) Pu P.C. Biakmuanpuia,
Mission Vengthlang Bial
- (15) Pu C. Laldingliana,
Kulikawon Bial
- (16) Pu V. Lalrinmawia,
Vaivakawon Bial
- (17) Pu Lalchhuanliana,
Bungkawon Bial
- (18) Pu K. Lalruatpuia,
Venghlui Bial
- (19) Pu Lalmuanpuia
(Asst. Coordinator, KṬP)

OFFICE BEARERS:

Leader : Rev. J. Lalremsiama
(Synod ruat)

Asst. Leader : Pu Samuel Laldingliana

Gen. Secretary : Upa Zonunmawia
(Synod ruat)

Asst. Secretary : Dr. Lalliansanga

Treasurer : Dr. Julie Remsangpuii

Fin. Secretary : Tv. R. Lalramnghaka

Hun ropui KṚP Diamond Jubilee & General Conference 2014

— T.Upa Lalremsiama
Committee Member, Central KṚP

Jubilee lawm... KṚP General Conference hman hi thil phurawm taka ni hrim a, chu mai bakah kumin hi KṚP kum 60 (Diamond Jubili) a tlinna a lo ni bawk a. A phurawmna a zual sauh. Jubili puala thil ti meuh lo pawhin a tlingtlak ve theih mai tho a, mahse, thiltih a awm hian a hlutna a tizual ṭhin.

A huphurhawm lama thlir hi chuan thil tam tak hi tih theih a ni mang lo va. Jubili chi hrang hrang awm bawk mah se, kan lawm tlangpui chu kum 25 te, 50 te, 60 te, 100 te a ni tlangpui a. KṚP Jubili puala thiltih chi hrang hrang a awm kha a lawmawm. Centenary kan hlat tawh nasa mai si a, mi tam zawk chuan kan hmu phak tawh dawn lo a ni.

Sum lamin daih zan sela chuan a aia ropuia tih a chakawm tehlul nen... kan phak tawka ruahmantute an fakawm hle. Jubili puala Cental KṚP-in cheng nuai dawn senga Presbyterian Damdawi In gate an siam te khi a va han tih chi tak em!

Synod Conference Centre leh Laipuitlang leh Durtlang Leitan-a kraws lian enkawla chei hnûm tura Mission Veng Bial, Chanmari Bial leh Leitan Bial a'n ngen ngawt mai a. Ann'in phur taka an lo chei hnûm mai te kha Krista vang a nih loh chuan, eng dang vang mah ni theiin a lang lo tlat!

Thil ṭha ti atana siama awm chu kan tih tur reng a ni tih hriain Branch tam takin Jubili pualin mi kan ṭanpui a, thawhlawm kan thawh a; zun in, *adt.* kan siamin kan chei ṭha a, 'Rin chu thiltihah lang se' tih hi kan chhui dik hle niin a lang.

February ni 22 zana Branch hrang hrangten mei kan det a, a ṭhenin meithallawn an kap chhuak bawk a. A ṭhenin an chhuah ṭhelh bawk a, thlen chinah a hlimawm viau zel.

Hruaitu hluite pawh...

He Jubili lawmna atana an puala hun siamah (22 Feb 2014) phur takin an tel thei a. An hun leh theihna zawng zawng

sengtu kan hruaitu hluite hian chawimawi an phu hle. An phu tawk erawh chuan kan chawimawi zo lo! Vanah chawimawina ropui tak an dawng ngei ang.

General Conference-ah pawh hrisel leh phur takin mi 34 lai hruaitu hluite hi an tel thei a. Conference-a hruaitu hlui kal thathnemna ber a ni hial awm e! An hun lai suangtuahpuitu tan chuan a lunglenthlak hle. Central hruaitu hi mi 210 vel lai kan nei tawh a; KTP hruaitu hmasa ber zingah Pu Vanlalkunga'n min la dampui a, hrisel leh dam rei turin kan duhsak hle.

Thil thar pahnih...

Tute emaw tan chuan thil thar hlir pawh a ni zawk mai thei. Thenkhat erawh chuan an lo tawng viau tawh thung ang.

Diamond Jubili kum a nih baw avangin General Conference leh Jubili lawmna hun hman a remchang nghal hle a. Ngaihtuahna nasa tak sengin kan hruaituten ruahmanna an han siam a, zanlai men thlen chu an tihthlan loh ni mah se, Jubili leh Conference chungchang vawng chuan an men rei a thul si.

Aizawl lamah chuan Zaipawlpui nei turin Aizawl

huam chhunga Bial Zaipawl zawng zawngin Mission Vengthlang leh Mission Veng Kohhran Biak In-ah hla vawi hnih an zir a. Aizawl pawn lam Presbytery hrang hrangah a huhoa zir a ni baw. Hei hi thil thar a ni awm e. A ropui dangdai hle. A tak taka zai pheih kha chu ngaihnaawm tak a ni.

'Concert' tih hian a 'huau huau' lam a kaw duh viau mai. Mahse, a ni hran lo ve. Tun tuma concert kan neih kha a tha ngawt mai. Hei hi thil thar baw a ni. Hrang hluiho an la phur hle a, thang tharte pawh an duai hauh lo. An inpekna chu hahpui viau turin kan han ngai ngawt a, taksa hah viau chungin an rilru lam erawh chu a hah lo tih a lang reng. Upa Sanglian-thanga te, Rendezvous te leh Pu R. Lalbiaksanga te an la inzo hle.

Thil thar hmuh tur awm baw chu Synfo lamina thlalakna atana crane an hman kha a ni. Kha khan awlsamna mai bakah TV lamah a chian phah.

Rorelna lam thung...

A hma lamin member-te zingah rorel hun a tawi deuh thu sawi a awm a. Kum hmasa lam rorel hun kha a tawt deuhin a lang rêng a. Nilenga rorel

theihna hun kan nei ta... Rin ai erawh chuan kan ngawichawi lek lek thin chuan a lang.

Bial aiawh palai 179 kan kal a, kan kim niin a lang. Branch aiawh palai 748 kan kal a, palai 60 bawr velin kan kim lo niin a lang. Harsatna avanga kal thei lo pawh kan ni mai thei a, kal kim theih a chakawm ngawt mai.

Agenda (General) 14 kan neih te a tha hlawm hle a, tihhlawhtlin atana chakawm tak takte kha nakin atan kan khek khal hrih a nih ngei a beiseiawm. Agenda atana chhawp chhuah nawn leh chakawm tak tak, tun tuma kan passed tak loh a awm nual.

A serh zinga mei...

Conference apianga a tel lova kan tih ngai loh chu Hla Bu leh Zai hruai lam a ni. Conference hla bua hla thlan dan hi kum 60 tlin nen a inhme hle a, hman atanga tun thlenga hla sak lar tawh thinte atanga hla 50 dah a ni leh a tul huna sak mai theih tura Lengkhawm hla 10 dah a ni hi a tha ngawt mai. Hruaitu hluite tuipei phak leh tuna inhmang tirte tuipei a inpawlh tha.

Heng hlate hi zai hruaituten an tulpei em em a. Branch hrang

hrangah hun awl nei hman lek lovin an zir a, Branch lam lahin duat tak taka duatin chaw an lo eipui thin a. KTP nih a nuam ngawt a ni. Music arrange zawng zawng bakah bel taka hla 60 thiam a ngai a, an thiam bel em em vek! An inpekna azarah Conference zai boruak a tha a tih ngam.

Khawzawl an fakawm!

A hahthlak dan tur hi suangtuahpui thiam a har zawk! An vir char char a ni ber a, buai viau e ti lovin hlim hmel an pu reng thei! Khatianga Pandal lian leh mawi tak din kha thil awlai a ni hauh lo. Kan leng lo kha thil mak a ni lo, mikhual sing hnih chuangchu...kan thahnem em a ni!

An inbuatsaihnaa an thawh hona a tha hle tih a hriat theih a. Titinaa hriat danin mikhual an lo duat em em vek niin a lang. "An thleng zo hle mai" tih sawi rik a awm nuk. Bawlhhlawh awm hman meuh lo khawpa tleirawlho che khan hmun an tifa em em mai baw k a, khaw hawi a nuam.

Conference tak tak...

Palai lawm zan (Ningani zan) atanga Pathianni zan thlenga hun hman kha a hlimawm em em vek mai a. Inkhawm erawh chu dan

pangngaiin a tawi lo. A ðu hmasa te chu darkar 5 te an ðu ðhin. Hei hian Conference hlutna a hril hlein a lang.

Sawi sen loh a tam hle mai dawn...

Inkhawmpui hlawhtlinna ber chu tui taka zai a ni e an tih ðhin chu, he conference-ah hian a thleng Chiang e. Kan speaker-te baka hruaitute thusawi a ngaihnaawm hle. Huaisen taka

thusawi hi, a dik a nih phawt chuan a ðha.

Conference-a tih nei zawng zawngte thiltih zawng zawng kha hmuhnaawm a tling vek a. A mal mala chip a chakawm tehlul nen... A tawp berah chuan... Conference hian ram min tihpumkhat tlat avangin neih zel ni se a ðha. Dam takin Champhai-ah kan intawkhawm leh ðheuh dawn nia!



BAG BO

General Conference vawi 55-na, Khawzawla neih zawh takah khan counter no. 24-na aþangin mahni branch mite bag emaw tia bus-a lo hlan palh a ni a. Mahni bag hmu zo lo kan aawm chuan Ph. no. 9615301445/9862467978-ah biak theih a ni e.



BUL TANNA

Ring ngam phawt mai teh...

An rinawm sawt mai ang.

I rin miau chuan..

I rin ang taka rinawm tumin tan an la lo thei lo vang.

Min ring ngamtute chu

Mi an rin ang takin rinawmnain kan chhang let ðhin.

An thiam ang leh

An phak tawk ta an tih chu a tawk.

An tlin chin chinah..

Hriat thiamna nen ring ngam teh.

Tichuan...

An phur phah ang a,

Tui tak leh ðhahnemngai takin an thawk mai ang.

LAL ISUAN KAN HREHAWM A HRIA

— M.S. Dawngkima Ralte,
Armed Veng

Thian ka nei a. Amah chu mite aia danglamna nei chuang lo, mi pangngai ve mai, hmeichhe tam takte duhthusam ang ni bik lo a ni. Amaherawhchu, he hla KHB no. 134-na 'Kan Isua ang thian dang reng an awm lo' tih hla hi a duh em em mai a, Biak Inah leh fellowship-ah a thlang ziah mai a. "Eng vangin nge he hla hi i duh em em?" tiin ka zawt a. Chuta min chhanna chuan ka rilru a hneh em avangin ama sawi dan ang thlapin ka'n ziak ange.

"A ni leh thla chu ka hre ta lo. Eng vangin nge mi hi an intihlum thin tih hre thiam uarh uarh khawpin ka سوالنا avangin ka rilru a beidawng a. A chhan chu, ka pianthar fe tawh hnuah eng eng emaw vangin ka hel a, chu chuan KTP leh kohhranah tui lohna min siam a. Chumi nghawng chuan khawvela tlan châk lehna min pe a, chu chuan ka nun a tiro

ngawih ngawih a ni. Inkhawm ka chak lo va, Pathian thuin keimahah awmzia a nei thei baw lo va. Hremhmun hrehawm turzia chu ka hria, Vanram hi khawvelaia a nawmna tur reng hre lo tur khawpin ka lo chawlawl ta reng mai a.

Tichuan, Pathian duh zawng a ni lo tih hre reng chungin ka bansan tawh thil tha lo lamah ka ke ka pen leh tan ta a. Amaherawhchu, ka zahawmna tihchhiat ka hlauh avangin hmanlai anga ualau leh langsar erawh chuan ka khawsa lo, inthup thiam ve viau pawhin ka inhria. Tin, ka mualpho dawn hnai nia ka hriat chuan ka nghei leh hmak thei baw a. Thil reng reng hi mahni inthunun theih loh phah nan kan hman loh chuan tih thiang vekin ka hria a. Chutiang ngaithei lotute chu mi intivei, Taliban rilru pu leh inti up-ah ka ngai a. Ka private life min khawih buaitu nia ngaiin ka ngai thei lo va, kei aia an thatna reng ka hmu lo a ni. Tun hmaa kei ngei pawhin سوال nia ka lo pawm thlap thin ruih theih thil leh inngaihna سوال chinin ka pawm zamin ka hmu mam ta vek mai a. Chutih lai chuan ka thil hmuh leh hriatten ka tih thin chu سوال a ni tih min hriattir mah se ka thinlung a khawih pha lo a ni.

Amaherawhchu, chutiang chu a lo ni reng thei hauh lo mai a. Thil tha lo ka ti a ni tih min hrihtu ka chhia leh tha hriatna chuan ka thinlungah thu a sawi ring tulh tulh a; tin, ka bum emaw ka tih ka chhungte leh ka mihringpuite chu ka bum reng thei lo tih ka hre ta bawk nen, ka chhia leh tha hriatna chuan min tibuai ta hle mai a. Ka mualpho tak tak dawnin ka inhria a, bansan a hun tawh tih pawh ka hria. Mahse, a tawp nan tiin tawp tak tak si lovin ka la pen ta cheu a. Ka leng chhuakte hian ka thihna tur lam ka pan nite hian ka inhria a, thihna hian ka velah hian thla a zar duai ni hian ka hre bawk a, mahse, hma lam ka la pan cheu a ni. Sual hian thil a lo tih theizia mai chu(h)!

A tawpah chuan ka hneh loh ka tawng ta. Ka سوالنا chuan min um pha ta a ni. Ka chhia leh tha hriatnain thil سوال ka ti a ni tih min hriattir reng avanga ka rilru hahna lo pung zel leh ka سوالنا avangin ka chhungte an rilru a na em em a ni tih ka hriat avanga ka rilru hahna infinkhawm chu ka hneh ta lo a ni. Hei mai bakah tu mah ka hrih duh hauh loh rilru hahna chuan a lo belhchhah bawk nen. Chu ka rilru hahna tihrehna tur pawh ni lo a chhawkna tur takngial pawh

eng mah a awm lo tih ka hriat hnu chuan ka bei a dawng a, ka rilru a hah em avangin hlim vang ni hauh lovin ka nuihte pawh a za hial a ni.

Pathian duh loh zawng a ni tih hre reng chungga helna rilru pu-a سوال tih luih pawizia chu ka hre ta a ni. A hma chuan thih hi ka chak lo va; mahse, thih hi ka hlau lo ka ti thin a. Tunah chuan thih hi ka chak a, hlauh pawh ka hlau ta lo a ni. Thi ila ka rilru hahna zawng zawng hi a reh vek dawnin ka ring a, thihna chu ka phurrit min chhawkto tha ber niin ka hre ta hial a. Mahni intihlum ka lo ngaihnep em em thinte chu eng vanga intihlum nge an nih tih ka hre thiam ta uarh uarh mai a. Amaherawhchu, chutih lai chuan mipa ka nihna leh ka chapona chhala ka lo sawi ve thin, 'eng vang mahin mahni ka intihlum lo vang, heng lungngaihna leh hrehawmna hmachhawn tur hian ka chak tawk a ni' tih hi ka sawi mawlh mawlh bawk a. Hei chauh hi min dangtu a ni. Mahse, ka hneh loh buan ka nih miao avangin keimah leh keimah pawh chu ka inringhlel ta hial a.

Chutia ka nihna leh ka chapona avanga ka ti lo vang ka tih pawh ka rinhlel tak hial avang chuan ka intihlum mai

ka hlau ta a. Pathian hian min lo ngaidamin min lo la ðanpui duh mial takin tiin Biak Inah ðawngtai turin ka kal ta a ni. Kalkawngah pawh chuan mi sual tu emaw hian min hmu se, min that daih se emaw, accident tawk ila thi daih ila tih hi chu ka duhthusam a la ni cheu mai.

Biak In ka thleng a, ka ðawngtai thei lawk lo va, ka kir leh mai dawn em ni aw ka ti a, ka kir leh chuan ka hmabak chu thihna a ni tih ka hre chiang hle. Mahse, ka kal tawh a, ka ðawngtai tur a ni. Ka ðawngtai ang a, eng mah ka nih loh chuan a tawk a ni mai. Pathian hmaah tih tak zetin ka ðawngtai ta a. Ka sual zawng zawng ka puang a. Ka rilru awm zawng zawng, tu mah ka hrilh duh loh chenin ka puang a. Ka chhungte rilru ka tihnat em avangin ngaihdam ka dil a. Kohhran leh KTP laka ka helnate avangin ngaihdam ka dil a. Ka rilru hahna zawng zawng pawh tu dang vang mah ni lovin ka sualna vang a ni tih ka puang a. Heng rilru hrehawmna phurrit hi min lak kiansak lo mah la ka mamawh ber chu i chungka ka sualnate min ngaihdamna hi a ni tiin thupha chawi leh ngaihdam dilin ka ðawngtai ta a. Tichuan, kei mi sual hi Lalpan min ngaidam ta a ni. Ka phurrit pawh min laksak ta, a va ropui em!

Hre reng chungka Pathian duh loh zâwng anga ka awm tawh hnu pawhin Lal Isua chu ka tan ðhian ðha ber a la ni reng a ni. Ka lungngaih lai ber leh hrehawm lai ber pawh kha min hriatpui a, Amah pan turin min lo ðanpui reng a, eng anga mi sual pawh Amah pantu chu ngaihdam duh loh a nei ngai lo a ni. Kan Lal Isua ang reng hi ðhian dang an awm lo, pakhat mah an awm lo.

Tichuan, hetiang taka min hmangaihtu Pathian tan hian tih tur nei vein ka inhria a. Eng vang maha Amah phatsan tawh lo turin, ruih theih thil reng reng hi ka kaah a lut tawh lo vang, Pathian leh A rawngbawl na aia ka dah pawimawh dawn chuan ngaih zâwng reng reng ka nei tawh lo vang tih leh nupui ka neih hma chuan tu lakah mah mipat hmeichhiatna ka hmang tawh lo vang a, 'Keia tan erawh zawng Pathian hnaih hi a ðha a ni' tih hi ka nun kaihruaitu atan ka hmang tawh ang tiin ka intiam ve ta a ni" tiin min chhang a.

Ka rilru a hneh em avangin he hla hi kan sak apiangin ka tan pawh Lal Isua ang hi ðhian dang reng pakhat mah an awm lo a ni tih hriatna nungin min hriattir a, tui takin ka sa ve thei ta a ni♦

ZU LEH WINE

— Upa Zartzokima Khiantge
Madanrtng, Shillong-21

Mizoramah hian zu chungchang sawi hian tawpintai a awm dawn lo niin a lang. Ringtu kan ni bawk a, ngaihtuahna puitu atan Bible-in a sawi dan, kan hriat tawh sa ni mah sela han târ lan hrâm ka duh a. Amaherawhchu, 'Bible' han tih hian ðhenkhat lo ner tawk kan lo awm leh mai ðhin.

Hebrai ðawng bul lama a lan danin uaiin hi chi hrang hrangawmin an sawi a, chungte chu:- tirosh, khemer, yayin (common drink, a tlanglawna an hman), shekher (strong drink, a chak chi), âsis' tih lehlin bawk, 'stove' hi beer ang a ni awm e. Thuthlung Hlui lamah chuan uaiin hi an pawlh dal ngai lo va, Thuthlung Thar - Hellenestics-ho erawh chuan an pawlh dal ðhin an ti.

Ruihnain a nghawng ðha lo te:-

1. Novan a fapa tlum ber ânchhia a lawhna chhan

pawh amah a ruih hmasak vâng a ni.

2. Lal Ahasuera'n a nupui Vasti a bâнна chhan pawh, a rui lungpuamin, a nupui hmelþa leh pian nalh tak a milianho rui hmaa in-'show'-tir a tumna avang a ni. Anin zurui hmaa in-'show' ai chuan, a zahawmna humhim a a nihna chan pawh a lo huam si. Lal pawh a rui a lo harh leh chuan, a inchhir tih a hriat (bung 2:1).

3. Lota pawhin a ruih avangin a fanute lakah Israel-te kumkhaw hmelma tur hnam hnih a hrin phah.

4. Lal Belsazzara pawhin chapo takin Jerusalem Temple aþanga a pa'n no serh thianghlim a lak hmangin zu ain a, chawp leh chilhin Pathian rorelna a chungah a thleng nghal a, thah a ni a, a lalram pawh a chan nghal.

Pathian thuin 'uaiin kawnga mi chak tak, zu chawhpawlh kawnga thahrui nei mite chu an chung a pik e,' a tih leh, 'A ðhenawm hnena zu in tur petu chu a chung a pik e,' a tih te hi hriat reng a ðha awm e.

Khasi unaute zingah hian mipa zu in mite hi tarkuna dam

an tam lo an ti. Bible-ah hian zu in khap burna chu a lang lo niin a lang, amaherawhchu, a sawi mawi lo hle.

Kan ramah hian NGO tam zawkte hian khap burna dan hi hlih an duh tlang niin a lang a, amaherawhchu, he dan hi hlih a nih chuan zu in buai an tam dawn tih hre rengin khauh taka hremna lekkawh an duh theuh niin a lang.

Mi tura hraia, a tihdam lehna tur damdawi tha tak ngaihtuah leh ang chauh a ang hle. A hmanna te leh a sawi mawina te –

1. Tuan leh mang a tang tawh khan uaiin hi chaw ei rualin an in thin niin a lang a. Thu thlung Hlui hun lai a tang tawh khan chaw ei rualin an lo in thin (Gen 27:25,28; Thuhrlitu 1:7).
2. Melkizedeka pawhin chhang leh uaiin Abrahamama hmaah a hlui (Gen 14:18).
3. Ruai tel ngei ngei a ni (Estheri 1:7; 7:2; Joba 1:13,18).
4. Thilpek (present) anga hman a ni (1 Sam 25:18).
5. Levia hote puihna tura thilpek zingah telh a ni (Deut

18:4; 2 Chr 31:5).

6. Thil hlante zingah a tel (Ex 29:40; Lev 23:13).
7. Jehova malsawmna tel ve niin a lang (Thuf 31:6-7; Luka 10:34; Marka 15:23; 1 Tim 5:23).

Khap a nihna te –

1. Nawhchizuar te, uaiin te, uaiin tharte chuan thinlung a la bo thin (Hosea 4:11).
2. Puithiamte chu biak buka, rawngbawla an awm lai reng rengin uaiin in hi khap an ni (Lev 10:9; Eze 44:21).
3. Hman thiam loh chu khap a ni (Thuf 4:17).
4. Nazaret mi'n Pathian tana thu tiam a neih lai chuan in khap tlat a ni (Num 6:3).
5. Roreltu dinhmun pawimawh chelhtute tan khap a ni (Thuf 31:5).
6. Kohhran Upate tan khap a ni (1 Tim 3:3,6).
7. Tisa thiltihte zingah a tel avangin khap a ni (Gal 5:21)

Uaiin hian a chak dan azirin alcohol (ruih theihna) 8 a tang a 14 percent a awm vek a. Um (fermented) leh um loh (un-fermented) erawh chu a awm tih hriat a tha awm e.

ENG LAI PAWHA ENKIM MAMAWH CHU LAL ISUA CHAUH

— Lalvenkima Ralte,
Model Branch

Run eng emaw lai aṅanga ka rilru luahtu, ziaak chhuak ila tia ka rilru ka lo sen ve ṅhinna, eng emaw avanga ka puitlin theih loh chu hun remchang Lalpan min pe hlauh mai a, ka lawm hle mai. Ka lo ziaak mai lo te pawh kha ngaihtuahna thar min petu a lo ni zel mai. Mite angin ṅawngkam leh thiamna nei sang lo mah ila, ka tih theih tawka tih ve hi Lalpan mal a sawm ang tih ringin ka'n chhim ṅhal bekang puah ve phawng mai dawn a ni.

Hemi thua ka ngaihtuahna tizautu ṅha tak mai chu, KṅP ten kum puan thupui kan zir chhoh mek hi a ni a. Thupui ṅhen hnihna kan zir, kan sawi hona aṅanga ka ngaihtuahna tithartu chu thil siam hrang hrangte kan inmamawh

chhawn zel dan - Ecological Balance tih ṅawngkam, rawn sawitu pakhatin a sawi kha a ni. Pathian thil siam reng reng, a te ber aṅanga a lian ber thleng hian a enga mah hi ṅangkaina nei miah lo kan awm lo va. Keinin ṅangkaina nei lova kan hriat te pawh hi tu tan emaw chuan nunna hnar a lo ni ve tho va. Kan tana ṅangkai tak kha tu tan emaw chuan a lo hnawksak leh viau thei bawk. Tin, hmanlai Mizo nunah chuan zu khan hmun pawimawh tak a luahin aṅangkai hle ṅhin a, tunah erawh chuan thil hnawksak, kohhran leh ramin kan do rawn a lo ni tawh a. Kristian kan nih hmaa thil pawimawh leh hnam nuna bet tlat ṅhin chu zu a ni a, Lal Isua erawh mamawha inhriatna reng a awm lo. Mahse, kan lo mamawh hle si, mamawh nia inhriat lohna tak kha mamawh tizualtu niin, tun thleng hian kan la mamawh reng a, kan dam chhung chuan kan mamawh reng dawn a ni. A tel lova awm thei lova kan inngaih ṅhin leh kan nuna bet tlat ṅhin, zu erawh tunah chuan a hla thei anga dah bo dan ngawt kan zawng ta. Kan mamawh tak tak zawk chu kan chiang mai awm e.

Khawvel thiamna leh hmasawnnain Mizoram pawh min kal hlên bik loh avangin lunglen changa min hnem turin hmanraw hrang hrang leh lei nena țang kawpin *audio tape* kan han ngaithla a, kum eng emaw zat chung chu kan lung a awiin, lehpek tur awm tawh chuangin kan hre țhin lo. Mahse, chu kan thil duh leh ngainat em em, kan lunglen hnemtu leh kan lungawina chu a aia thil țha dang, CD player-in a rawn luahlan thuai a, chu pawh chu computer, pendrive leh hmanraw țha dangin a rawn luahlan leh thuai a, kan hre chang tawh țhin lo. Mahse, Lal Isua erawh chu, audio tape ațanga computer mai pawh ni lovin, chatuan thleng pawhin kan nun pum pui tan hian a pawimawh dan a la pangngai reng dawn a. Kan mamawh lo emaw kan intih poh leh kan mamwh zual tawlh tawlh mai a ni. Hmanlai naupangten inkawm hlim nan kal chhet kal, inhnawk, inbah, buk sak, etc. kha nuam ti takin an hmang țhin a (keini naupan ve lai thleng pawhin a la ni). Thlang sappui mi ngo fate pawh kan ngai bik miah lo. Mahse, tunah chuan Mizo naupangte zingah pawh khang kan infiam ve țhinna te kha ngainat chu sawi loh,

inhnawk leh inkawibahten a tihlim zo tawh lo va, a hming pawh hre tawh lo hi an tam zawk hial tawh âwm e. Lal Isua erawh chu khang hun hma daih ațanga vawiin thleng hian țhian nei lote tan țhian, infiamna leh intihhlimpui tur nei lote tana eng tik lai pawha nun hlimna pe theitu a la ni reng.

Kum tam pawh a la liam lo. Kan nepnawi ei tur neih tui deuh deuhthe kha – theihmu, khampat zung bâwk, nghardai, theitât par (sawi sên pawh a ni chiah lo ve) tih vel te kha an ni mai a. Biang thleng thlenga theihmu eina kan hawlh sen theih kha chuan kan lawm a kim em em ringawt mai a nih kha. Tunlai hunah te chuan naupang te pawh theihmu ei duh pawh an awm tawh meuh lo... A hming pawh kan sawi thiam loh khawpa tui te a ni kan ei tawh ni. Mahse, Lal Isua chu maw, Theitât pâr ei hun lai ațanga tun thleng hian rilțamte tâna tlai leh puarna, tisa leh thlarau tana țâm hnemtu a la ni reng asin. Ngawi teh, kan infiam țhinna pakhat, tlangsam leh hnim buk awm apiang kan bawh pet țhin lai te kha aw...engtin nge tun thleng thlenga nungdama kan la

awm theih tih mai awl tak a ni. Mahse, rilru thianghlim takin, tu mah huphurhna nei lova kan lo tihlan thin vang ni hmiang, min lo hualhim zel a, tun hi kan thleng ve a ni reng mai. Hmanlai (ti mai ila) nun nawmna leh awhawmzia min hriattir a duh vang te pawh a ni mai thei e. Tunlai naupangte chu, puitlingte tana hriat thiam phak loh khawpin infiamna hmanrua chu an nei tha tawh. Mahse, an nun hi a hlim zo tak tak lovin

ka hre thin. A chhan chu maw, inhuphurhna hi naupangte aţang hian kan lo nei lian tawh em a ni. Nu leh pa leh aia upa te thuawihna lah kan tlachham tawh. Eng emaw pek zet loh chuan naupang te pawh duh duhna lama intirh mai te hi harsa tak a ni tawh nia! Naupang t a thi lah kan tam sawt lehngal. Mahse, hman aţanga tun hun thleng hian amah hnaih tlattute chu a venghim tlat bik zel nia ♦



SYNOD CHOIR RAWNGBAWLNA

1. **RAMTHAR NORTH:** February 15, 2014 (Inrinni) chhun leh zan khan Ramthar North Biak In hawnnaah an zai a,  um 2 dinah hla 4 an rem
2. **TANHRIL:** February 16, 2014 (Pathianni) zanah Tanhril Kohhranah an zai a,  um 4 dinah hla 9 an rem. Choir Director Pu Vanlalhruaian thuchah a sawi.
3. **KTP DAY 2014:** February 22, 2014 K P Day - Hruaitu Hluite Pual programme Synod Conference Centre-a neihah an zai a,  um 4 dinah hla 4 an rem.
4. **KHAWZAWL:** K P General Conference, Khawzawl (February 27 -March 2, 2014)-ah  um 6 dinah hla 7 an rem.
5. **KOHRAN HMEICHHE ROREL INKHAWM:** Kohhran Hmeichhe Rorel Inkhawm, Durtlang (March 9, 2014)-ah  um 1 dinah hla 2 an rem.

SULHNU



Ni. C. Lalneihkimi

Ni. C. Lalneihkimi hi September 23, 1984 khan Thingsulthliah khuaah a lo piang a. A pianpui unau 6 zinga upa ber niin an unau hi hmeichhia 4 leh mipa 2 an ni.


A theih ang tazoka kohhran leh khawtlanga mi thahnemngai tak mi a ni a. Falkland Branch KṚP hruaitu hlun berte zinga mi a ni. Kum 2004 aṭanga 2007 thleng khan Branch Committee member a ni a. Kum 2008-ah Treasurer-ah thlan a niin kum 2009 leh 2010-ah Fin. Secretary-ah thlan a ni a. Kum 2011 aṭanga 2013 chhung khan Treasurer-ah bawk thlan niin kum 2014-ah Branch Committee member-ah ruat a ni.

Evangelical Cell rawngbawlna lamah pawh mi thahnemngai tak niin kum 2011 aṭanga 2013 chhungin Evangelical Cell Sub-Committee-ah Branch O.B. incharge a ni a. Kum 2014-ah Treasurer atan ruat a ni leh bawk. Member-te huikhawm thiam leh

member hlate leh chak lo zawkte dawm kangtu ṭangkai tak a ni.

Kum 2014 Ṭhuampui Pastor Bial KṚP Conference vawi 9-na, Muanna Kohhran Biak Ina neihah Bial Treasurer atan thlan a ni.

Amah hi mi hrisel pangngai tak a ni a, a boral hma pawh hian a damloh thu leh insawiselna a neih thu pawh hriat a ni lo va. February 16, 2014 Pathianni chawhnu aṭanga zan thlengin Falkland Kohhran Biak Inah BSI Aizawl North III Branch Annual Meeting vawi 13-na neih a ni a. Hetah hian Receptionist niin Kohhran Zaipawlah pawh a tel a ni. Zan inkhawma Kohhran Zaipawh an zai zo thutna an pan hnu hian a luhai thu a sawi a. Ṭinna hla an sak laiin a luhai avangin a tlu ta thut mai a. A rang thei ang berin Greenwood Hospital panpui nghal a ni a, anni hian C.T. Scan tihna khawh an neih loh avangin Civil Hospital lamah C.T. Scan ti tuin an lo refer a. C.T. Scan report-a a lan dan aṭangin a thluakah hian thisen a lo flinghnm hman viau a, a BP a san bawk avangin a dinhmun hi a ṭha lo hle a. Thawk lam a harsat zual avangin oxygen pek a ni a. ICU room a remchan loh avangin Greenwood Hospital ICU lama dah tura phurh pheih leh a ni a, mahse enkawlna eng mah tih hman lovin February 17, 2014 zing dar 3:20 khan min lo kalsan ta a ni ♦



**Tv. Lalthawmliana Rate
Leader, KṬP Model Veng Br.**

Tv. Lalthawmliana Ralte hi March 3, 1980 khan Pu. R. Lalrintluanga (L) leh Pi. Chalnguri te fa u ber niin Sailamah a lo piang a, an unau hi pali an ni. Thawma hi a naupan lai aṭangin naupang hrisel leh harhvang tak a ni a. Aia upa te zah thiam tak a ni bawk. Tal-ent nei ṭha tak a ni a, thu leh hla lamah pawh a sang hle. Thu leh hla a thiamin lemchan thu pawh a ziak fo ṭhin a; chu bakah, lemziah thiam tak a ni bawk. A talent hi KṬP leh YMA lamin kan chhawr nasa hle. A bikin KṬP Model Veng Branch-in drama kan chan tam zawk hi a ma kutchhuak a ni a, he lam ringawt aṭanga thlir pawh hian kan Branch tan chuan channa nasa tak a ni. Biak Ina kan electric leh ṭawng rinna lam pawh hi ama hova kan tih deuh vek a ni nghe nghe.

Naupan lai aṭangin lehkha thiam thei tak a ni a, Mizoram University aṭanga M.A. (Mizo) Batch pass hmasa berah khan a tel nghe nghe a ni. A ṭul ang ang thawh hreh

lo mi, mi taima leh tumruh tak a ni. Tuna a thawhna Carolyn Elementary School, Thakthing-ah hian kum 2008 aṭang khan thawk ṭanin, tunah hian Headmaster a ni mek nghe nghe a ni. Naupang kilkawi a thiam em em mai a, naupang te pawhin an ngaina hle a ni. Kohhran rawngbawlina lamah hian a inhmang hma hle a. KṬP Group Committee Member leh Secretary hna te a chelh hnuin kum 2003 aṭangin KṬP, Model Veng Branch-ah Branch Committee Member a ni a, kum 2007 aṭangin OB-ah a lut a, hetiang hi a chanvo lo chelh tawh dan a ni: Finance Secretary (2007), Asst. Secy (2008, 2013) Secretary (2009, 2012) Treasurer (2010) Asst. Leader (2011). Kumin hi O.B. chanvo a chelh kimna chiah niin, Leader a ni mek nghe nghe a ni.

Naupang Sunday School -ah pawh Department hrang hrangah zirtirtu leh Asst. Leader hna te chelhin kumin hian Junior Department-ah Leader a ni mek. Kohhran Sound and Light Committee-ah Asst. Secy. a ni a, Building Committee-ah leh Naupang Chawhnu Inkhawm Committee-ah Committee member niin, Nilai zan thupui hawngtu a ni bawk.

Khawtlang rawngbawlina lamah pawh a phak ang tawk leh a theihna kawngah mahni kova thil tih tur awm hlen chhuah tum ṭlat

mi a ni. Model Veng Branch YMA Executive Committee-ah kum 2005 ah lut ñanin; hetiang hi YMA-a nihna a lo chelh tawh te a ni. Executive Committee member (2005, 2006, 2012). Asst. Secy. (2007 - 2011, 2014) Finnacle Secy. (2013).

Tun hmain lung lam natna a neih hi hriat a ni lem lo va, amah hi tuarchhel tak a ni baw. February ni 20, 2014-a a pa boral hma deuh añangin a khua a sikin a awm a na baw a, a khuh fo ñhin baw. A pa boral ni pawh chuan damdawi inah vawi hnih kalpui a ni a. Test hrang hrang tih a niin, fel lo lai hmuh a ni lo. February 21, 2014 tlaiah Dr. P.C. Lalthlamuana panpui a ni a, doctor hian lung enna ti turin a lo ti a, test dang result te pawh a ñha vek a, damdawi a chawh ang ang te a ei a, mahse nachhawkn a ei loh chuan a khawsikin a kalsan hlei thei lo va. A tuk ni 22 khan lung test tur hian a taksa lam a chauh deuh avangin a chhuak peih lo va, amah kal kher ngai lova test theih, a zun leh khak test ni in a result a la ñha vek a. February 23, 2014 (Thawhñanni)-ah a lung en leh a ni a, a lung a vung tih hriat chhuah a ni a, a lung vung hi a nasat deuh tawh avangin doctor-in damdawi ina lut mai turin a lo ti a. Feb. 24. 2014 (Thawhlehi) tlaiah khan Green Wood Hospital-ah dah luh a ni a. Ngaihtuahawma a lan loh laiin Feb. 26, 2014

chhunah zual lam a pan avangin ICU-ah dah luh a ni a; ICU-ah hian rei pawh awm hman lovin hemi ni chhun dar 12:15 khan rawng a lo bawlsak ñhin Lalpa hnenah min lo hawsan ta a ni.

Kan Leader-in min boralsan mai hi hriat thiam harsa kan tiin, Kohhran leh khawtlangin kan tuar tak zet a. A bikin KṚP lam phei chuan a tel lova kal hi kan zuam lo tak zet a ni. Branch-in tih tura kan lo ruahman lawk tawhte pawh ñhulh leh a ni hlawm. Chutih laiin, KṚP Genenral Conference lai tak a lo ni baw si a, Branch pum huapa kal phei chu kan ñhulh nghal a; mi 2/1 loh theih lohva kal ngai kan awm a; chu pawh chu Conference-ah kan taksa a tel ve ringawt a ni ber mai. Chutih rualin, CKṚP hruaituten kan Leader thihna hi min hriatpuiin min tuarpuiina thu te min rawn thawn a, a lawmawmin a thlamuanthlak kan ti tak zet a ni. Tin, Conference-na a member thite sunnaah pawh a hming te lam rik hial a niin, kan member-pui khati zat khan min tuarpuiin min ñawngñaipui a ni tih kan hriat avang erawh chuan kan thla a muang tak zet a. Min ñawngñaipui zel tur pawhin kan ngen nghal baw che u a ni.

*A mi thianghlimte thihna chu
Lalpa ngaih chuan hlu tak a ni.
Sam 116:15*



HRINGLANG TLÁNG


Tum khat chu sumdawng pakhat, hausa fe mai hi an nupa an hlim loh em avangin thurawn dilin counsellor hnenah a kal a, counsellor hnenah chuan beidawng tak maiin, “Ka nupui nen kan inneihna chu a tawp ta a ni ber e. Thawmhnaw tha ber berin ka thuam a, in leh lo tha ber ber ka dinsak a; mahse chuti chung chuan ka lakah a lungawi chuang reng reng lo. Chuvangin, awm dun thei kan ni tawh lo,” a ti tawp mai a.

Counsellor chu a ngawi vang vang a, sumdawng hnenah chuan, “A ni maw. Mahse, i hun awl hman dan mi hrilh teh, a bikin tlai lamte?” a ti let ve thung a. Sumdawng chuan, “Ka eizawwna chu min ruaitute thu leh hla ngaihthlak theih nana hun neih a ni a; chuvangin hun awl han tih hming hmerh tur pawh ka nei lo. Chau takin inah ka hawng a, ka nupui hian ka chungah lainatna a lantîr ngai lo a ni,” a ti leh a.

Counsellor chuan, “A nih leh, i nupui i lenchhuahpui hnuhnun ber eng tik lai hun nge ni tawh chu le?” a’n ti thut mai a. Sumdawng chu mak ti zetin a meng zau kawk kawk a, counsellor hnenah chuan “Lenchhuahpui a? Chutianga heheu mai mai nan hun ka nei lo tih ka sawi zo chauh a ni lawm ni?” a ti ve thung a.

Counsellor chuan muang dam dap hian, “E khai, a ni maw? Nangmah ruaitute chu i ngai pawimawhin an tan i hun hlu ber i seng phal a, anmahni vil reng renga vir buaiin an thusawi pawh i ngaihthla nileng hman a ni a. I nupui chuan a chang tlem chein, a tan i hun i hmang tlem hle mai a,” a ti ta a.

Sumdawng chu a harh ta. Inah a hawng a, a nupui tan a hun tha ber hman a duh tâk avangin a programme siam sa zawng zawng a sut nghal vek a. Thla a ral meuh chuan chu sumdawng chuan counsellor chu a rawn hmu leh a, lawm em emin, “Ka nupui chu hmeichhe danglam a ni ta!” a ti ta a.



KANTU

Dinthar Vengthlang Branch

Dinthar Vengthlang Branch hi Dawrpui Vengthar Pastor Biala awm a ni a. Kum 2005-a Dinthar Kohhran ațanga Dinthar Vengthlang Kohhran a indan veleh Kohhran Committee chuan Dinthar Vengthlang Branch KŦP hi a din nghal a. Branch Committee hmasa ber chuan an Branch Rising Day atan April 2 hi a pawm a. Branch a din tirh lai hian KŦP member hi 248 an ni a. Tunah (2014) hian member 402 an ni tawh a ni.

Branch Committee-ah hian Member 20 (OB 6, Committee Member 12 leh kohhran Committee aiaawh 2) an awm a. Kohhran huam chung hi Bial 6-ah ințhenin, bial khat zel hi OB 1 leh Committee member 3 zelin an inchan sem a. Branch OB-ten Kristian Ŧhalai chanchinbu semin, committee member-te hian Faith Promise an khawm Ŧhin.

KŦP Member hi Group 4-ah an ințhen a. Ezekiela Group, Isaia Group, Jeremia Group leh Junior Group tiin hming an vuah a. Group tinah hian OB 6 leh Committee Member 8 Ŧheuh an awm a. Anni hian Ŧhahnem ngai takin, Branch tih chak leh member-te huikhawm kawngah hma an la Ŧhin a ni. Kum tin Branch leh Group

hruaitute tan infuihtharna/leadership training an buatsaih Ŧhin.

Kum 2013 ațang khan Sacrament leh Senior Department zirlai, KŦP member ni rualte chu an nu leh pate phalna ngeiin KŦP member atan an la a. Group khatah awmtirin, an Group hmingah Junior Group tih a ni a. Branch OB ațangin Group Leader tur ruatin, Secretary tur pawh Branch Committee ațangin an ruat Ŧhin. Group OB dang leh Committee member hian ruat lovin member zawng zawng hi committee-ah an awm nghal a. Budget atan Rs. 3000 an tuk ve a. An budget tuak dan tur leh an sum mamaawh apiang chu Branch Committee-in a ngaihtuahsak mai Ŧhin. Zirlai deuh vek an la nih avangin, an lehkha zir tibuai lo turin Branch activities hrang hrangah teltir vein chanvo an siamsak Ŧhin. Junior Group member-te hi an phurin Branch tinuamtu leh Branch kut ke pawimawh tak an ni.

Group dangte budget chu Rs. 10,000 Ŧheuh a ni a, Group hruaitu leh member-te an țangruat em em a. An budget let aia tam Ŧheuhin budget hi an khum thei Ŧhin a ni. Group-te hi kawng hrang hrangin an inel Ŧhin a, chung inel nate chu -

(i) Bible chhiar chhuaktu tamah

(ii) *Thawhtan zan inkhawm leh fellowship kal tamah*

(iii) *Budget tlak hma leh khum tamah*

(iv) *Hla zir leh remtu tamah*

(v) *Kohhran leh KṚP hnatlanga kal tamah*

Branch leh Group hruaitute hi Nilai zan, Inrinni zan leh Pathianni chawhnu inkhawm tamah an inel ṭhin a. Hruaitu inkhawm ṭha leh member hnatlang ṭha te hi kum tawpah chawimawina an hlan ṭhin an ni. Bible chhiar chhuak, hla zir ṭha leh rem ṭha te hnenah lawmman an pe bawṭ ṭhin.

Sub-Committee panga - Evangelism, Light & Sound, Programme, Refreshment leh Decoration Sub-Committee te an nei a. Branch thurel bawhzui leh tihlawhtlin kawngah an ṭangkai ṭhin hle. Member hla te tan theihtawpin hma an la ṭhin a, an inah tlawhchhuakin branch hmalakna tur hrang hrangte hriattirna leh sawmna lehkha an pe a, street preaching te neiin, gospel camping te an buatsaih ṭhin bawṭ.

Thawhtan zan hi sermon inkhawm nan leh Central KṚP-in thupui zir tur a ruahman zir nan hman ṭhin a ni a, Pathianni chhun leh tlaiah a inchhawkin ṭawngṭai inkhawm leh fellowship neih ṭhin a ni. Member-te intihlimna atan kum tin Branch Sport uar takin an hmang ṭhin a. Kuminah hian Action Plan atan Branch Sport, Literature Week, Branch dang tlawh, Blood Donation Camp buatsaih leh Group Night hman an tum a. An veng chhunga kohhran hrang ṭhalaita nen Join Service an biak

ina neih tumin hma lakna an kalpui mek bawṭ.

Kohhran zaipawṭ ṭha tak an nei mek a, Zaipawṭ member hi 70 aṭanga 90 inkar vel an ni tlangpui. An member biak in hawnga nupui pasal nei, missionary/hun puma rawngbawṭ tura inpete hnenah chawimawina thilpek an hlan ṭhin a. An member aṭangin BD zir chhuak 1 leh missionary-a kal 3 an awm tawh a, Synod Revival Speaker a lak 2 an awm tawh bawṭ.

Member boral an awmin ralna hun an hmang ṭhin. Thla tin Thawhtan zan hmasa ber leh Pathianni hmasa bera thilpek an lak khawmte chu Relief Fund-ah dahin, an kohhran chhunga ṭanpui ngaite hnenah an pe ṭhin a ni. Kumin Financial Year aṭang hian kohhran kaltlangin missionary 6 an chawm ṭan leh dawn a ni.

Branch Chanchinbu, Pathianni tuka chhuak 'Peniel' chu June 5, 2005 aṭanga chhuah ṭanin, bahlah awm hauh lovin tun thlengin an la chhuah zel a. Tunah hian 230 copies an chhuah mek a ni.

Kristian Ṭhalai Chanchinbu hi 117 copies an la mek a. Kumina Branch budget atan Rs. 6,50,000 ruahman a ni a. Sum vawṭ leh enkawṭ nan hian Synod Financial Rules hman ṭhin a ni a, budget ruahman an neih ang taka sum hman an tum ṭhin a ni. Bial KṚP Conference an thlen huna hman tur leh KṚP General Conference-a kalna senso atan thla tin Rs. 2,000 bank-ah an dah ṭhin bawṭ.

Keimahni



■ February 18, 2014 khan Asst. Secretary Pu V.L. Muanchhana, Pu Lalngthinglova Hauzel leh T.Upa Dr. H. Lalthanzara te General Conference thlengtu tur Khawzawl inbuatsaihna, Seat Arrangements leh Foreign delegates te thlenna tur enfelpuiin an kal.

■ February 18, 2014 khan Bukpui Branch Diamond Jubilee hmanpuiin Upa Zothangzuala Chhangte (Treasurer) leh Tv. R. Lalramnghaka (Com. Member) te an kal a, Variety Programme-ah Tv. R. Lalramnghakan thuchah a sawi a, zan inkhawmah Upa Zothangzuala Chhangte-in a sawi.

■ Dt. 18.2.2014, Thawhlelni khan Bairabi Chhim Veng Branch KṚP te chuan an Branch KṚP din cham 16th February leh KṚP Day 22nd February denchhenin Kolasib Hospital-a damlo a mamawh apiangte tan thisen unit 33 an pe.

Branch Committee-in ruahmanna a siam angin Branch KṚP Rising Day 16th February leh KṚP Day 22nd February hmankawpna remchangah ngaiin hemi denchhen hian Blood Donation Camp hi huaihawt a ni a, Kolasib Hospital-a thawktute hian a hmunah kal chillhin Kohhran S.S. Hall-ah thisen pek a ni a. Branch KṚP Member mipa 29 leh hmeichhia 4-in thisen unit 33 an pe a ni.

■ February 21, 2014 zana Aizawl khawpui chhung bialte, Jubilee Zaipawl Pui inbuatsaihna atana a huhova hla zirna tura Chanmari Kohhran Biak In ruat lawk chu Zonet Mizo Idol Final zan nen a lo innan avangin chawpchilh takin Mission Veng Kohhran Biak Inah sawn a ni.

■ March 7-9, 2014 chhung khan Durtlang Kohhran Biak Inah Mizoram Presbyterian Kohhran Hmeichhe Rorel Inkhawm nghah a ni a, Central KṚP aiawhin Tv. R. Lalramnghaka (Fin. Secy. thar) leh Upa K. Rorelkima (Com. Member) te an palai.

■ **BRANCH DING THAR REPORT:** Tuithumhnar Bial chhungah Zochawchhuah Branch a din thar thu report kan dawng a, affiliation fee Rs. 50/- an rawn thawn a, member zat erawh an report tel lo.

■ **CONFERENCE HLA BU PEK:** Presbyterian Youth Joint Conference, Phai Synod, Myanmar palai KṚP General Conference-a lo kal ten min dil angin General Conference 2014 hla bu copies 50 pek an ni.

■ **KṚP DAY 2014 - HRUAITU HLUITE PUAL:** February 22, 2014 KṚP Day chu Diamond Jubilee lawm kum a nih angin Synod Conference Centre-ah CKṚP hruaitu hluite pualin programme buatsaih a ni a. Hetah hian hruaitu hlui 125 an lo tel thei. Chawhma lam hun Upa Zonunmawia, GS-in a kaihruai a, Pu Vanlalkungan hunserh a hmang. Leader Rev. Lalrinmawian inlawmna thu a sawi a, Asst. Secy. Pu V.L. Muanchhanan inhmelhriattirna hun a hmang a, Pu R. Lalhmingthangan Diamond Jubilee Souvenir hmalakna a report a, Executive Secretary i/c KṚP Rev. P.C. Pachhungan Souvenir Pathian hnenah a hlan. Chawhnu lam programme chu Upa Zothangzuala Chhangte, Treasurer-in a kaihruai a, Asst. Leader T.Upa Dr. Samuel Vanlalthinglanga paper buatsaih "KṚP - hmân, tun leh nakin" tih zir ho a ni a, tlaiah chawhlui kil ho nghal a ni.

■ **FOREIGN DELEGATES-TE THLAHNA PROGRAMME:** March 4, 2014 zan khan Synod Conference Centre-ah ram pawn aṭanga KṚP General Conference 2014 min rawn hmanpuitu Presbyterian Church in Taiwan Youth leh Presbyterian Youth Joint Conference (Myanmar)-te pualin hun hman a ni a, Synod Moderator hmingin zanriah buatsaih a ni bawk. Inthlahna inkhawm hi Asst. Leader T.Upa Dr. Samuel Vanlalthinglanga a kaihruai a, Asst. Secy. Pu V.L. Muanchhanan inhmelhriattirna hun a hmang a, Synod Moderator-in thu tawi a sawi. KṚP, Chanmari West Branch ten hnam lâm an entir a, Mizoram Synod Choir an zai bawk. Gen. Secy. Upa Zonunmawian ngaihhruiina thilpek a hlan a, CKṚP Leader thar Rev. J. Lalremsiaman malsawmnain min ṭin a ni.

■ **BRITISH DY. HIGH COMMISSIONER HMU:** March 12, 2014 khan Senior Executive Secretary Rev. Lalzuithanga leh CKṚP Gen. Secy. Upa Zonunmawia ten British Dy. High Commissioner Scott Fursse donn Wood, Aizawla lo zin chu Hotel Regency-ah an va hmu a, July thlaa Synod Choir te Wales kal tur thu te an sawipui a, Dy. High Commissioner chuan visa chungchangah theihtawp lo chhuahpui a inhuam thu a lo sawi a ni.



Kantu: Dinthar Vengthlang Branch



Bukpui Branch Diamond Jubilee hmanpuiin Pu Zotea leh
Tv. Ramnghaka – Branch hruaitute nen.



Taiwan aṭanga lo kalte Reiek tlawhpui an ni a. Reiek Branch-in zanriah an lo
buatsaisak a ni. An cham chung hian khawpui chung hmun hrang hrang
tlawhpui an ni a, kohran thenkhatah inkhawmpui an ni bawk.

Postal Regn. no. MZR/81/2012-2014
RNI No. MIZMIZ/2009/29074

GENERAL CONFERENCE SPEAKER-TE



THU SAWITU DANGTE

